

衣隱山房詩集

衣隱山房詩集

評贈

儀徵阮元

芸臺

大箸小石渠閣經說並詩鈔奉納飫讀數過說經諸篇極爲
精鑿議禮各條尤雄辨明确三禮通釋匆匆未及卒讀爲憾
詩筆沈雄幽逸兼漢魏盛唐之勝其堅實妍雅則虎頭遺民
金風亭長之勁敵也船已過關何不暫留數日多領教言貴
老師何東洲如有確耗望書數行通知相好不必作楷也

道州何紹基

子貞

揚屹風雅有餘蘊綜叙今古有餘采辨晰名理有餘味此吾

不請山房詩集
薌谿詩之能莆四始也俊逸似高青邱雄厚似顧亭林妍雅似朱竹垞此吾薌谿詩之兼善三家也

侯官林則徐少穆

飮讀大箸風骨沈雄情韻淒婉天姿學問兩者具備五言古
醕至澹泊恃源敦厚七言歌行屈蟠頓挫矯健縱橫兼有抗
墜抑揚之致五言七言律震越渾宏又復雲霞縹緲七言絕
句曲折繚亮餘意不置蓋能合于建步兵蘇州工部大白東
川義山青邱少谷亭林梅邨竹垞爲一手而復鎔鑄四部囊
括七畧出以沈鬱之詞婉麗之旨感慨時務蘊抱宏深經世
大畧不朽盛事當今作者安得不以此事推袁讀竟爲之儉

祗贊嘆得未曾有

開縣 陳壽祺 恭甫

根柢深厚詞旨娵雅是能追步風騷出入漢魏直合亭林竹垞爲一手冥心三禮精之益精而詩筆如此雄秀石渠長賓浣花老杜一人兼之矣

歙 王茂蔭 子槐

逸秀沈雄自成一子漁洋山人詩爲近代大宗惜不能八面受敵今讀孝廉詩真能八面受敵矣

長洲 陶 樑 鳧鄉

有金石氣亦有薑桂氣故能八面受敵

晉江陳慶鏞領南

凌鑠漢魏追攝唐宋才力雄大凡馬一空

邵陽魏源默深

連日晤談見閣下醺邃淵懿蓋孫泰山石岨嵎之流亞也近讀大箸詩集沈雄逸秀卓然大家集中比體似浣花興體似青蓮此其所以冠倫魁能爲當世寶

象州鄭獻甫小谷

漢人無不工文而經生則不必工文服孔鄭何是也唐人無不工詩而經生亦不必工詩顏孔殷陸是也宋以後經學無專家詞學有專家其能者淹貫考訂以示博若馬貴與鄭漁

仲王伯厚唐荆川楊升菴方密之及顧亭林朱竹垞諸人
昔之分爲二者乃復通爲一雖不必號經生不必號詞客不
能不號爲通人矣聞南薌谿教授昔以治禮經得名卽以獻
禮書得官於世人研練聲律講求格調之詞學似有所不屑
昨見其射鷹樓詩話今見其衣謫山房詩鈔又復宏肆綿密
才大律細此真耕田得稻鑿井得泉視世之謹守倉囤販賣
瓶盎以救飢渴者有霄壤之別爰抒所見不但論其詩然所
以論其詩者亦於是乎盡

光澤

高澍然

雨農

諸體意豁足以赴題筆健足以達意氣雄足以振筆詞備足

以舉氣非沈浸於太白諸古樂府不能有此真煌煌巨製也

益陽湯鵬海秋

導源漢魏追步盛唐俯視古今籠罩一世讀竟爲之伏首至地

侯官周豐元介農

詩魄極雄詩膽極大詩骨極秀詩情極婉揮霍風雲騁馳雷電足以橫掃古今推倒豪傑矣

泰州王廣業子勤

鉅製骨雄肉秀格老氣蒼總制清衷遞爲心極五七古高者直前無古人後無來者香山樂府且遜况汗流籍湜耶六義

俱備上迫風騷拜服令人百讀不厌

宜黃符兆綸

雪樵

措意似杜植體似韓其行神行氣又往往似蘇綜三家而抉其精五湖三江呼吸吞吐遂能如淮陰行陣建大將旗鼓又如楚軍鉅鹿之戰呼聲直動天地此薌谿古體詩所爲沈博而絕麗也其五七言近體樸實堅緻一語不墮時習子交海內詩人夥矣前十年得識亨甫張君亨甫詩長劍倚天不可迫視其語語見骨而皮附者不能去今復得與薌谿交讀薌谿詩耳目震盪殷殷隆隆竊謂亨甫才人之詩而學足以贍之薌谿志士之詩而學博才雄足以副之蓋學勝者詩之又

進一境而其恃源敦厚謹繩法度則如一二君皆閩產也論
閩中近時詩人允稱二傑對此予乃陋同邾莒悔不早焚筆
研也

閩縣 林壽圖 穎叔

尊箸古體偉麗峭雋中兼有勁直樸質之氣源本韓蘇委注
虞劉五言長篇闢闊震蕩尤得浣花神髓與小長蘆抗衡近
體亦擅前明國初諸老風力於亭林尤近固由學勝欽佩之
至閣下湛深經術又擅經濟才他日有不徒以詩傳者

光澤 何秋濤 願船

雄秀在骨幽豔在肉宏麗在皮以淵博之學發爲浩瀚之詞

原本經術出入騷雅此才一出當與天下共寶之

仁和錢步文冬士

大箸如天風海濤震蕩心目而超妙幽峭則又如王子晉月
夜吹笙足以破行雲而凌碧落也於治經之家得此奇才令
人佩服無已

臨桂朱琦伯韓

大箸五七古雄奇跌宕兼有韓蘇之勝近體瀟灑出塵不失
風人之旨其根柢從經術出積之已厚味之彌旨所謂豪傑
之士不爲時代所汨沒者

監利王柏心子壽

百寶沐浴五兵縱橫足爲當世大才匆匆奉納未獲細校但覺精曜華燭心目震蕩而已古體多奇作五七律不墮開元大厯以下

善化 孫鼎臣 芝房

導源李杜浸淫韓蘇囊括諸家無體不備瑰偉宏博其天才固然亦由陶冶旣深故紛紜揮霍無不如志敬服敬服

曲阜 孔憲彝 緒山

詩不難於有才而難於以法用才薌谿先生能以幽峭之筆厲之於大氣盤旋之中動合自然功力獨至洵爲近今作手

平定 張 穆 石洲

李杜韓蘇併源而出如此詩筆真不愧海內奇才披讀數遍
爲之傾倒之至

長沙李杭梅生

治經說禮之士兼長詩筆代無數人集中諸體直薄風騷力
追唐宋近代顧亭林朱錫鬯而外誰與抗衡

長沙徐樹銘壽衛

原本經術胚胎漢魏雄才灝氣澎湃乎灌蘇解而趨韓潮矣
那不鼎足崑山小長蘆

邵武張際亮亨甫

胎息深厚氣格沈雄詩境如豫章翻風鯨魚跋浪又如入桃

源勝境別有洞天我欲買絲繡之

閩縣 林夢郊 石甫

詩固不難有性情性情而具氣骨之難薌谿之詩蓋氣骨而出以性情者矣予與薌谿年相若遇相若志亦稍稍相若獨予詩則弗若遠甚此予所以愧薌谿也其可傳處諸君子論之最詳盡然予特不願其以詩傳薌谿亦不自喜傳以詩耳

閩縣 劉存仁 炯甫

蛇鳥風雲之陣金戈鐵馬之聲天空海濶之懷凌古鑠今之氣近代亭林翁山梅村竹垞而外誰爲敵手

侯官 黃瑞麟 連卿

大箸渾雄壯濶秀逸風華吳鉤欲騰龍虎耀彩荆璧乍剖玕
琪飛光其氣則長鯨碧海其情則翡翠蘭茗可與亭林竹垞
二家鼎峙爲三 細觀通集多沈鬱處多峭逸處多奇闢處
如此詩筆必傳無疑

侯官

王廷俊

偉甫

五古老蒼適勁靈氣往來溯源漢魏大旨於杜韓爲近七古
崇宏開敞如建章宮千門萬戶臚列紙上極宇宙偉觀時體
則清微窈眇又若冷風吹空孤月在水飄飄乎瑤埃上征迥
出俗境於世之刻翠裁紅者不值一唾矣

侯官

王道徵

未蘭

雄奇瓌瑋橫視古今此才罕有其匹昔劉吏部公融言七律較五律多二字耳其難十倍譬開硬弩只到七分若到十分滿者極少林薌谿孝廉集中七律可謂開到十分滿者吏部見之定當把臂入林矣

閩縣 蔣 鎔 少陶

魄力雄灝根柢宏深近代以經師而深於詩學者顧亭林以後吾薌谿一人而已他人不足多也

漢陽 葉名灃 潤臣

天才亮拔氣格沈雄直合昌黎眉山爲一手捧讀數遍真有望洋之嘆

大興彭琳賓南

鉅製新機紵心古豔沐手天空海濶潮湧瀾翻長篇則洪響
鏗鐘近體則天衣裁錦良由根柢既深故爾嘯歌自得方諸
竹垞儘可抗衡比以亭林洵堪步武兼才學識爲史通天地
人曰儒三復斯集願拜下風

高安朱舫芷汀

昔人調學者如牛毛成者如麟角蓋深歎操觚者之難也薌
谿先生湛深經術著作等身其所作古今體詩雅健雄深渾
灝流轉直不啻麟角之在抱矣

肅甯苗夔仙輅

秕糠兩漢槃飢六朝金心在中銀手若斷作者悲壯似杜超
逸似李雄浩似韓蘇貴鄉鄭少谷後以大箸爲二雄再三盥
誦欽佩無旣

侯官林士雍穆人

沈雄俊逸五七古上自步兵少陵下至梅邨竹垞皆併筆而出近體亦迫中盛具此數枝好筆自可上窺漢晉下矚元明自成一子總持詩教非君誰歸

桐城張用禧辛巳

本朝精通經史而兼工詞章者以小長蘆爲最必其質文兼擅始足以副博學鴻詞之選薌谿先生治經數十年醞釀深

厚其發而爲詩故能沈鬱頓挫凡纖佻浮靡之氣一洗而空
他日薦舉鴻博爲先生首屈一指矣方之竹垞允無愧色

嵩山
倘來道人 惺惺子

詩以言志然必先有骨而後有肉有皮前代前七子李何諸
公有皮而尙有肉至後七子王李諸公有皮而並無肉何論
骨哉碌砒山人詩骨騰肉飛不事皮相而在內者有心有肝
有膽具此三者始可言志大集行世慎勿負在枕煙亭時雲
外之約可也

衣謫山房詩集

題詞

嘉應溫訓伊初

先生許鄭倫擘經擁南面貫串三禮學著述數百卷

所著三禮通釋

極博而精道州何子貞先生稱爲神通廣大之學

上下數千年窮本乃知變挾摘前

人誤目光能掣電兼精訪訓旨古義識通轉

所著說文二徐本刊爲補遺極

確其論象形指事轉注精於數段二家

我初讀其書望洋眼瞑眩餘事作詩人

騷壇掉鞅羈百怪入肝腸萬象困剪鍊漢魏唐宋明陶鎔成

一片與我同南下雄談興無倦謂我古詩文渾樸非謬質何

意詹詹言乃登上上選

先生編昭代十二家古文以余作備一家又著詩話收拙作甚多韓

孟雲龍逐四方上下徧勗哉不朽業儒林文苑傳

邵武張際亮亨甫

萬里風雲掃墨來瑯嬛讀遍上駟臺

陳恭甫師小瑯嬛館藏書八萬卷君以七年遍

讀佳者為作提要

能持剛筆能柔筆亦是仙才亦鬼才長劍斬蛟誰

並駕神鎚擊虎勢難摧中原霸業分齊楚可否苞茅進酒杯

乾嘉以來詩教頗禠近見二三詩家乃勝薛小侯耳時飲道山座間黃蓮卿孝廉問曰君與薌谿乃齊楚之霸耳君為齊乎楚乎余曰吾服膺屈賈則楚耳薌谿笑曰君集中某某篇鉅作也如方城漢水吾當以伍兩師旅攻之若某某篇特苞茅耳吾不責其入貢縮酒滿座軒渠鼓掌

順德羅惇衍椒生

書上三大禮九重歡稱奇自家供睥睨餘子敢禁追倒峽

才如此旋乾手在斯願登著作堂多師是我師

韓大集
集中句

晉江陳慶鏞頌南

歸田七品官呻吟萬首詩淋浪湖海氣滌蕩天風吹濁醪澆

塊壘雄才射鯨鯢

君著射鷹詩語甚佳

懷抱觀生平偶露胸中奇

初印木詩

話英夷以重價向坊間購之

邵陽魏源默深

詩有煙霞氣人疑謫歲星他年笙鶴返遺此作丹經

蕭谿精
參同契

樸學難兼美亭林外幾人河間君子館浩劫共千春

近日河
間掘得

君子碑乃獻王
館毛公處也

益陽湯鵬海秋

長空朔風起黃鵠相鳴翮
萬里羽翼齊一朝遍八埏
河漢聲西流元化日夜遷
讀君雅頌詩安得不相憐
茫茫百世後作者誰比肩
出海上下逐龍雲同一天

歛郭應辰仲和

雄文兩漢接三唐一手君能綜眾長
翔步禮堂追許鄭高歌

樂府軼張王那知策有固毡異

君屢上春官第三場皆似此沉博絕麗而未邀特賞

才誰旗鼓當賢舍莫嫌牆壁具六經
敷教大文章

時課學生背誦七經

前以三禮通釋賜讀心折久之茲復以衣冠山房詩鈔見示無體不精非讀破萬卷不能道其一字又令鯁生頌場士矣

宜黃陳偕燦少香

長劍倚天星亂飛神師怒躡百獸懼
老蛟夜泣蒼龍吟鈞天

一奏靈璫協林生詩骨秋波寒冽刻造化成奇觀少陵已往
退之死此調寥寥誰肯彈吁嗟此筆迴狂瀾

烏文螭簡青霞鋪神樞探出三壬符

薊谿博極羣書著
有經說數十種

經生

詩伯兩相副近代亦數長蘆朱落落乾坤只數子眾哇尙悅
箏琶耳仙芝不飽鳳皇饑王郎斫地悲歌起仰天鳴鳴吾醉
矣

侯官

吳聯穗

瑞人

奇才上可撻黃鶴餘子紛紛絕等倫虹氣排空亘萬里琪花
著樹自千春蛾眉見妬真知己龍性難馴抗古人我本山中
風漢侶攜君詩卷醉芳辰

閩縣林士傳可舟

讀書萬卷筆如神壓倒才人與學人文采夢中翔鸞驚工夫
手裡縛麒麟拾來瑤草非無意修到梅花是此身千載吾家
傳盛事經師詩伯兩為隣

汴陽周揆源鐵臣

琳宮貝闕富奇觀寶氣還從倚劍看天下幾人能學杜用友
湘泉文章百代合瞻韓似君搖筆山皆動令我望洋海共寬
早向閩疆枋一幟張衡未敢據騷壇謂張亨甫

宜黃符兆綸雲樵

中原旗鼓幾騷壇江左流風誤謝安乾隆嘉慶之間詩人如袁簡齋一派實風雅之

蠹虱北獨洗雙瞳如古鑑要持此筆障狂瀾孝廉方驪龍熟著詩話

睡探珠易天馬生騎歷塊難一樣離騷激哀怨蕭條沅芷與

汀蘭

侯官張慎欽臣

莽莽風濤捲翰來森嚴壁壘倚天開三唐以後少雄筆七子

之間敵俊才謂建安七子硤礪半生狐鬼嘯興亡六代管絃哀解

衣直當漢書讀佐我狂夫醉百杯

長樂楊春蕃陶運

獨闢騷壇壁壘新能教餘子走踈踈古無狂狷成何世天爲

文章屈此人十載未售劉綽志一官無補鄭虔貧可憐與我

同寥落一領青氍毹水濱

侯官林廷禧范亭

學海經邦徧問津且將餘事作詩人射鵰樓是瑯嬛室萬卷
流通筆有神

胸吞夢澤探驪珠馳驟青蓮步大蘇近代詩家誰把臂顧崑

山與小長蘆

君論近代詩許可朱作宅顧亭林二家

絳跼一集冠吾鄉

恭甫師有絳跼草堂詩鈔

弟子河汾各擅長文苑儒林

爭不朽斐光堂並遂初堂

亨甫有斐光堂稿君集舊名遂初堂稿

海內憐才幾鉅公京華惆悵客囊空論兵亦似譚詩壯氣作

長霄萬丈虹

君有平夷十六策平賊二十策經太僕卿王子槐奏進

廿載苔岑氣誼真科名況與棣華親
與陳亭兄同年力扶風雅吾家事可許雲龍逐後塵

閩縣林仰東子萊

壇坫今宗匠陽春和者希行空搏龍象倒海走珠璣才大誰青眼時平肯布衣魏公猶晚達矯翼盼高飛

泰州朱葆善櫻船

我讀時賢詩往往意不樂古音歎淪亡風氣日浮薄脩詞不立誠于焉偽體作妍媚強悅人竭力塗丹堊縱使蘭荪榮終覺根柢弱荷柱不勝梁老嫗恣譁諠自詡性靈詩衣鉢長慶託一倡而百和無乃受其縛誰歟挽狂瀾涇渭判清濁先生

實人傑矯矯雲中鶴獨自鞭古心經庫潛啟鑰往時著詩語
去取慎筆削不將質鼎登卽此見才畧果然錦囊中光燄令
人懼雙劍互森芒千花各吐萼高若天心穿險同山骨鑿至
味沃醪醕宏聲響鐘鐻竭來痛妖氛短衣欲振輔忠義溢楮
墨字字行間躍所言必可行眾口何從鑠詩史接浣花膏馥
耐咀嚼嗟余瓦釜鳴饑驅久失學籓籬未一窺目迷五色錯
江河日下時何以堅立脚野狐亦有禪誤會不可癢君其指
迷津俾我識先覺庶免面牆譏請振尼山鐸

吳縣 潘曾琯 玉泉

史學博於經學博射鷹傳並射鳥傳詩才直是萬人敵漢魏

之間開寶前

侯官

黃紹芳

條石

秋水芙蓉花自開豪情策馬向燕臺嶙峋嶽勢凌空起莽蒼
河聲到海迴一代風騷歸正雅中原旗鼓幾詩才少陵老筆
紛披在多少江山得力來

鎮海

姚

燮

柳伯

昔我渡滄海中夕發鬱洲皇皇天津河逢君夜唱酬君才九
萬里百年不我逾讀君千首詩能令烏白頭

閩縣

周球章

文進

放眼乾坤外凌空發浩歌雄才如海大肅氣得秋多巖谷聲

應振神仙劫不磨青天如問句風雨泣愁魔

一讀一擊節長言咏嘆之渾雄韓筆共哀怨楚騷遺幼婦吟
殊妙美人來未遲閩川風雅在烟月滿新詩

金華

王家齊

蘭汀

詩教重言志性情自有真繁惟性情正所貴學業醕芳潤漱
載籍忠孝事君親煌煌先聖訓四始六義陳楚人始變古詞
采何紛綸漢魏迄六朝積漸判畦畛三唐作者多崛起爭嶙
峴兩宋暨元明才彥亦彬彬源遠流多歧古義久浸湮淫哇
方迭奏箏竽間歌幽萬怪劇惶惑百態交變新暉緩與隳殺
桑濮兼洎滌川流合涇渭花落襍溷茵豈無大雅流壯志懷

苦辛學者九牛毛成如獨角麟側聞趨庭訓幼稚早壽紳望
古中激昂力弱志弗申閉門時自娛密爾忘賤貧執戟愧子
雲薄宦逐風塵結交謝時彥却掃惟逡巡觥觥林夫子傑出
當七閩六經窮奧旨當代并大春高名播四海儒流仰席珍
昨來嶺外遊邂逅越水濱示我盈囊作展誦驚絕倫萬卷讀
皆破驅使筆有神性情昭學術矩矱追先民儒流義宏達摺
紳詞雅馴蒿日感時艱迴異無病呻痾瘵切懷抱藹如言者
仁變雅有怨誹詞旨深淪渾三復坐太息使我氣復振薄海
方波瀾藝苑多荆榛世無楚卞和誰辨玉與珉與君偶會合
羈羽偕沈鱗樹類異世賢抗心希古人文章詎小技道在氣

乃純百年勿浪擲不貲視此身畢世閱蜉蝣晚節勵松筠元

音在天地斯道無緇磷

舊友周雨林以斯二語見題拙詩予愧不克當今轉以持贈國博時方相

與商權古今道術學業及詩教宗旨三復佳什爰賦五言古四百字奉題

後序

曩讀先生解經書精深廣大爲得未曾有恨不能一識面茂
己巳晤先生於仙城之海天琴舫喜慰願見乃先生不鄙杰
構昧朝夕過從出 太安人一鐙課讀圖命題且以所著衣
隱山房詩集屬爲跋語引杰爲識曲之真而入聽者竊謂作
詩之道必自成爲一己之詩而絕其摹仿依附之習乃可以
追踪古人傳示後世然非盡讀古人詩不能成此非盡忘古
人詩亦不能成此且非胸羅萬軸足歷萬里識越萬古仍不
能成此也嘗持是以求當代之言詩者乃今於先生得之先
生少承母訓以說禮見知於其鄉先生陳恭甫太史遂遊其

門得遍讀小娘嬛館所匿秘籍八萬餘卷由是簪書等身迨
舉於鄉計偕赴京師歷遊名山足迹幾遍天下論古今成敗
人物臧否雖燭照數計不能如其明且析也讀所簪四臣表
已可覘其概矣所謂胸羅萬軸足歷萬里識越萬古者舍先
生其誰與歸今讀先生詩囊括百家吐棄一切其雍容也如
春雲之出岫其高曠也如秋月之中天其典核也如三代法
物燦然畢陳令人肅然起敬其排比也如東岱西華之並峙
如長江大河之爭流至其遇事傷懷憂時寄慨則如飛電掣
影疾霆排空激洪濤於層霄隕巨石於千仞振發聲噴開拓
心胸他如樂府則六律八音純繹偕奏論詩則五雀六燕輕

重適均卽其短篇韻促情長如謠如諺如箴如規洵乎有美
必臻無體不善蓋其根柢原於萬軸波瀾壯於萬里識超
於萬古而又能盡合古人之詩以爲詩且復能盡離古人之
詩以成爲先生之詩視彼摹仿依坳者誠天淵矣觀止矣然
先生好學不倦老而彌篤且善頤養則其年不可量卽其學
愈不可量過此以往杰莫之能測之同治八年屠維之歲五
月番禺愚弟丁杰

衣謫山房詩集目錄

卷一

古今體詩一百又九首

卷二

古今體詩一百又三首

卷三

古今體詩一百又三首

卷四

古今體詩一百又二首

卷五

古今體詩一百又一首

卷六

古今體詩一百又二首

卷七

古今體詩一百七十八首

卷八

古今體詩一百又八首

衣讖山房詩集卷一

侯官林昌彝惠常

古今體

始旃蒙作噩時
年二十三歲

夢遊玉華洞紀所見

洞在延平
府將樂縣

靈洞創天工造物巧陶鑄亂石叱羣羊夢入仙山路千嵐萬
嵐煙九尺八尺樹厯亂落巖花飛起雙仙鷺別徑捫藤蘿足
下煙奔赴仙風吹帽簷肩雲空曲步神行洞裏月衣濕洞中
露九龍巖底宿蜿蜒瞞煙霧造化闕奇境入者毋自悞幽澗
水雲深其聲出晡暮不敢發笑音恐遭仙子怒

書禰衡傳後

撾鼓漁陽罵賊奇建安名士孰能之斯文元氣淋漓筆我愛
先生孔子碑人但知禰衡有鸚鵡賦而不知其所撰魯孔子碑及顏子碑爲有道之言非諸人所能及

夕陽

蒼蒼亭障散煙霞日斷鄉關夕照斜空谷無人惟落葉遠天
如夢有歸鴉河梁送客初分袂旅邸登樓正憶家萬緒千愁
應莫遣那堪惆悵暮城笳

烏石山房訪詩僧道源畱飲

鳥鳴空翠中殘陽在林隙陟磴疑步虛回環達岡脊方春蓄
媚景崖草紛如積雲影落衣裳雨香襲巾幘因尋支遁居遂
造空王宅之子結靜盟讀書屏人迹破夢警齋鐘遊心躡洞

石六時功課多宗旨兼詮釋遠公寬酒戒開筵喜供客譚久
散奇花興濃傾舊醪浮生半日閒良晤談今夕醉弄煙月高
四山蕩晴碧

柳色

嬈嬈臨風婉婉姿輕塵朝雨不勝悲六朝金粉消難盡十里
樓臺遠更宜曉笛江頭孤燕影春旗陌上落花絲雲山一幅
天涯望怕對尊前唱柳枝

旗山夕眺

薄雲弄暝光飛飛勢近遠天風吹未休白日忽已晚田父荷
鋤歸野人採樵返眾鳥投高林羣羊下平坂翛然心目清掃

石孤坐穩何來煙寺鐘催月上層巘

大嘉山拜李忠定公墓

青衣鬼哭青城月十年不返青城骨
兵頭老鐵化降雲世上英雄但淪沒
嗟公投袂起康王七十五日何匆忙
只怪人前閒管樂誰知君側容汪黃
須公一出此流寓天意豈應與宋祚
六飛已出狩無常三鎮何曾復其故
松風閣外北風哀猶似金人萬馬來
袍笏當朝戲猊狔金繒委敵趨輿臺
回首南都西日暮草白荒原竄狐兔
靈巖魂戀清涼山棲霞望斷湯陰樹
一聲白雁起胡沙茂陵金盃落人家
麥飯欲澆無尺土啼鵑血漬冬青花

水仙花絕句

凌波無語立亭亭脫盡塵埃喚夢醒
憑弔煙皋憐解佩湘雲湘月又湘靈

游白雲寺

倏爾有游興披蘿上翠微天花雲外落
海燕與之飛霧氣不離屐嵐陰常在衣
僧樓一聲磬鎮日坐忘機

題賈長江詩

一字推敲律不差圖成主客位名家
詩聲羌有澂澂節君看墳前鼓子花

長江舊墓多鼓子花後改葬房山

古意

千金買美妾萬金買園廬十萬買高爵無錢買少年

貧女

貧女安貧甚紉蘭佩自芳惟知勤織紡無事豔梳妝力卻千金聘甘分十指忙榮枯吾有命不肯玷幽香

寒號蟲

舉世皆趨熱之蟲獨耐寒寒號人不聽不聽賞音難得過吾且過應作如是觀怕逢泰吉了巧舌博聲歡

讀書南園題壁

一片亭亭月花新春更新月來臨水照花與鳥爲鄰此際眠琴趣翛然不染塵陰陰微雨過積翠隱鋪茵

嘯傲琴尊裏縱橫擁百城池魚行樹影山鷗愛書聲呼僕炊
晨飯聽鐘課夜更閑來嘗煮茗帶月掃柴荆

默坐息羣動閉關成一軍綠天蕉欲雨陰地石生雲萬影圍
牆合幽香靜晝聞鄰園蟬響裏伴我讀皇墳

莫道幽居寂霜華縞一林空山聞落木方夜起禪心立雪鷗
深夢負冰魚聚沈寒梅真可嚼書味箇中尋

西湖舟夜同陳蘭臣作

殿勳

滿船明月如可呼中央宛在畱斯須村邊村接樹邊樹山外
山連湖外湖鐘聲渡水上方寺漁火隔煙何處桴一尺白魚
跳波起十三橋畔響菰蘆

大夢山古冢

松楸寒入骨石馬立不發落葉起秋聲林間似咄咄山鬼暗
嘯風野狐私拜月下有大夢人歛魂臥泉窟

詠夢二首

太白謂處世若大夢余謂此夢實無人覺也然亦不
必覺亦無庸覺也張文敏公詠夢云乍離還覺明明
在欲說翻成漸漸消名句也作詠夢

瞬息飛來五嶺游星河欲曙照高樓昏昏夜店燒燈短的的
春閨倚枕愁命酒縞衣歌雪月歸舟朱字視笙篴千秋話到
陽臺事雲雨巫山何處求

塵生洛浦渺凌波虛牖風驚送恨多
歷盡憂歡思是種幻成離合意爲魔
蘊蘊蝴蝶誰家信款款鴛鴦別浦歌
芳草池塘方得句棲鳥無奈破眠何

與黃蓮卿秀才夜話

瑞麟

白露西風萬感增高城夜月訪詩朋
霜花滿地愁孤枕寒柝驚秋共一燈
如此星河宜久話年來壇坫愧同登
幽齋莫愴驚颺起刀尺深閨怨不勝

砧聲

到處秋風音可憐家家門巷搗吳絳
千聲哀杵霜凝指萬里明河星在天
塞上驚颺傳暮角江頭卷石咽淒煙
寒蟲落葉

同悲切望斷離人總黯然

元祐黨籍碑歌

女真鼙鼓來混同隕星化石朝元宮石裂霆震歸太空猶有
崖壁畱其蹤星宿森羅捫有鋒烏乎鴻濛裂光嶽元氣茫茫
眞宰鑿鬼神夜哭眞仙崖興懷文母不可作萬人擁馬溫公
來謫粵坡翁歸嶺隈伊川傳帶經筵陪三公衮衮濟時出竟
把藎臣作黨魁後黨忽至前黨竄紹聖力翻元祐案宣和又
取惇珪勘薰蕕老韓同一貫再變三變浮雲局羣臭羣芳事
星漢君不見汴城閉言路開童蔡斥逐楊時回公論明赫尊
風雷風雷未竟雲蒙起又見汪黃蹙宗李又見秦湯排趙史

趙鼎
史浩

書晉書愍帝紀後

劉曜焚宮作天子官民三萬同日死稽侍中血濺帝衣宮嬪
散作官軍妃神州陸沈非典午亂臣石勒生石虎諸陵發掘
餘枯骸銅駝街走君王苦

聽友人話古戰坂詩以弔之

九州清角響哀音神虎秋方旆影沈蘆管吹殘霜月冷戈鋌
葬盡雪花深寒驚星斗啼鼗鼓沙走關河死暮砧千載斜陽
餘片土白雲青靄弔空林

秋思

素月下東壁文露淒以寒崇柯起虛籟械械迴庭欄物候增
索瑟余心益寡歡美人隔萬里欲往稀風翰佳期昔屢阻行
路今良艱幽居感嗷嘆永夜空長嘆

書叅同契後寄李晴川先生

狂風捲逝波細雨生春草聞君朝攬鏡白髮蕭蕭老胡不鍊
金石使君長壽考珍重復珍重丹田以爲寶

帳中蚊

飽飫脂膏啗人血宵小二三難殄滅明時一摑如雷霆世上
君子須懷刑

書吳梅村詩後用陳秩庭山人原韻

懋德

巨刃摩天偃鼓旗江山搖筆大蘇碑千秋遺恨終銜口萬

離騷欲脫頤故國衣冠餘涕淚何時壁壘振雄奇南朝莫弔

諸君子雞犬梁園愧俯眉

梅邨有弔死事六君子倪元璐周之楨等六人詩極哀愴

書吳梅村弔思陵公主百韻詩後

皇枝小鳳質珊瑚下嫁文簫舊彩鸞太息周郎無限恨神傷

輦路玉釵寒

秋聲

莫聽風聲與水聲寒柯落葉入秋驚無情草木驅之響有恨
乾坤假以鳴喚盡愁人應慘慄攪來旅夢不分明商飈騷屑
空張觸百感縱橫對短檠

秋雁

落日寒沙暮影秋江湖銀浪接天流
數聲孤塞離人淚永夜深閨少婦愁
湘浦蘆花千尺水衡陽月色萬家樓
汀洲風雪謀梁急莽莽乾坤任去留

秋柳

江北江南夕照圖西風蕭瑟送長途
畫橋過客秋深淺寒笛吹煙影有無
隋苑鴉飛黃葉盡灞陵雁去碧天孤
關山莫愴凋零曲流水天涯感壯夫

感事三首

客有從江南歸者述吳楚歲荒兼憂水患浮尸橫江

餓莩載路爲之愴然

霖雨蒼生任匡居
羣百憂東南逢儉歲
天地話衰秋日極平
江路心傷破楚樓
可憐歌舞地魚鼈入新愁

急漲河湖合維揚
泛舳艫支祁騰古鍊
壁社間明珠孰障陳
登堰誰成鄭俠圖
磬磬諸雁戶觸處盡窮途

金粉江南會流離
最可悲何緣愁桂玉
竟使暗旌旗災祲連
三輔波濤接九疑
至尊勞肝食何策
貢清時

短歌

疏者日已疏
親者日已親
富貴與貧賤
一卷歸藏墳
墳中死骸骨
昨日方采薪
昔者哭戚友
今者棲煙塵
只見百年樹
不

見百年人

饑寒謠

勿笑人饑爾飽弗知勿笑人寒爾無心肝

夢中作

鼯啼猿嘯鬼磷微黑月茫茫暗鐵衣白草黃沙吹笛夜滿山
風雪雁南飛

寒鴉

野曠天長去復回汝鴉何事墜塵埃霜寒驛堠千團簇楓冷
關河數點來殘月淹淹樓遠浦斜陽黯黯弔荒臺餓聲咽啞
真愁聽滿目蘅蕪爲我哀

陳蘭臣落魄舊城以長歌代柬賦此答之

男兒作客輕萬里鞍馬天涯何日已衝雪敝裘竟至此修名
未立不可死讀君長篇當詩史擲筆狂歌走山鬼鐵笛橫吹
誰足比殘月蕭蕭照行李琴劍飄零淚難止魂夢歸來黯然
矣霜壓孤城哀笳起落葉秋聲亂入耳鼻無黃氣疇知已破
帽殘衫識者幾射虎南山履其尾拔劍飛花落如雨胡爲仲
宜悲客邸吁嗟乎朱門酒肉慎勿喜箕口才人誠有以

送許梅笛出塞

極目長江莽莽流暮城吹角上涼州雲埋雪磧飛征雁雨壓
邊花散朔鷗荒驛樹寒孤塞晚戍樓鐘急亂山秋茫茫大漠

胡沙地鬼哭荒原起客愁

風雨上石竹山

裂礪風霆走泉聲接渺冥鐘飛江樹黑潮落海門青亂石爭
孤嶂空煙蕩萬屏倚天拂長劍回首白雲停

題友人青草樓壁間

人代空悠悠煙雲行不留青來漁父艇翠上酒家樓流水楊
花怨斜陽燕子愁明當恣游覽五嶽寄扁舟

釣舟

半壁魚鄉地居然避俗塵蒹葭呼稚子車馬看勞人入鯢鮓
盈尺浮家花四鄰歌來山水綠此是葛天民

驛柳

滿天花雨晝冥冥驛柳飄零向客青
何處承恩何處怨看人幻夢看人醒
勞勞塵路忙無已莽莽江波去不停
一曲關山飛獨雁笛聲淒咽那堪聽

困關曉發

破曉發困關推舟楊柳岸篙工霧中語
行人水邊飯慷慨離故鄉遙望素雲斷
朝日升平林人影篷影亂卸帆負纜行
棧楫臨江半水石湛清輝釵葦抽澗畔
沄沄潭水生木杪暝煙散出樹聽鐘遲
中流起長歎

山行曲二章

谿外山山外樹樹間雲雲外渡亂山巒巒長亭暮晚煙幾處
茅檐露行人且向谿頭住

雲外聲來樵曲不見人聲斷續斜陽初紅山轉綠谿頭落葉
雲生足行人笑飲酒家醪

葫蘆山

沙鳥沒何處孤帆天際來灘聲舂向枕雲氣築成臺舟共石
高下巖同谿往迴斜陽紅樹外渺渺笛聲哀

高桐舟次寄友

濛濛春樹正煙昏遠岸迷茫暗有村回憶家山舊池館杏花
歸燕不開門

過黯澹灘

造化闢危灘厥名曰黯澹雷霆行地底雙峽如入坎谿山鬱
溟濛白晝雲駢黹平川化劍鏑一色石氣黹挽舟百夫力三
折落坎窞驚濤逐蛟鼉窄窄千菡萏水聲人聲襍喧阗一篙
撼出險曾瞬息舵師亦落膽談笑皆強顏默禱神靈感浪靜
泊洲渚谿谿聲在漁樵

晚泊劍谿寺門

紅樹青山宿火稀水亭隱現掩柴扉邨莊黯黯燈初暝河漢
冥冥雁獨飛涼露白橫荒寺冷大波綠送遠帆微灘頭怪底
驚棲鷺來盥游僧破袷衣

延平懷古

狼煙捲地俛鯢鯨
鏹斗寒凝戰鼓聲
萬槩樓船飛古渡
千家燈火枕孤城
甯陵許遠空弓鏜
淝水王琳失旆旌
碧血忠魂舉日月
登壇合擬一軍驚

劉坑夜泊懷劉三炯甫

存仁

今夜建州月蒼茫
起客愁一輪天上鏡
萬里海門秋峯影澹
欲遠谿雲凝不流
因風想之子此際獨登樓

舟發鼇頭

一葉渺然去人煙
向櫂開傍帆雙燕下
入眼萬山來水國雲
爲海谿灘浪作雷中流橫玉笛二月落疏梅

建安梨山古寺題壁

谿聲撼嶺走飛沙
刺史祠堂夕照斜
瑟瑟殘碑湮篆籀
蕭蕭古壁動龍蛇
空山杜宇爭啼血
層巘冬青亂落花
最是神靈呵護地
深崖燈火拜千家

政和左齋夜坐

清秋吹角暮城孤
寂寞官齋感壯夫
落日青楓嘯山鬼
蔓煙白草泣封狐
萬山飛瀑聲爭答
獨樹臨關幹半枯
腸斷他鄉荒隴地
蕭蕭琴劍兩師徒

黃熊山拜朱韋齋先生祠

韋齋先生
爲文公父

攀藤披棘上山阿
剔蘚捫苔碣
再磨聽唱南枝三嘯鵲
至今

桑樵尙謳歌

先生有詩就南枝三囀鵲樽前秋月半銜山之句政和士民至今誦之

清明日適郊見梨花盛開磬聲出遠林有悟

數聲清磬不知處

王阮亭句清磬山子蟲也

一樹梨花落晚空

宋人句梨花白鶯也

解得非花亦非磬詩家妙境悟禪中

武夷山大隱屏歌寄家子萊

武夷山人孤鶴形往來九曲邀羣靈納日吐月摩蒼冥道心
一往不可極招我共住雲霞屏茲山中立如建瓴谿流縈帶
清且冷深林淺麓迴芳馨眾峯羅列千娉婷石門花塢長不
高上有孤館明淵渟綠文金字堆黃庭寒栖道藏誰所銘山
人居此凡幾世叉手日誦茅君經因乞名山朝帝廷飄然夜

躡鳳凰例歸來千劫觀風霆平林煙雨醉不醒至今大隱招
不得但見蒼髯無頽齡煩君爲吹鐵笛聽穿雲裂石聲瓏玲
我行願託揚飛舫俯視身世如浮萍從君縱體登鸞輶乘風
飛上晚對亭長嘯一聲天地青

下黯淡灘

蕭蕭舴艋挾風驕銀漢西傾起怒潮白馬飛濤千澗走黑雲
捲地萬山搖聲高爭擊馮夷鼓日午聽吹伍子簫半壁危峯
一飛櫓猶疑風雨百靈朝

夜泊鵝洋

扁舟千里碧波遙射虎雄心久不銷獨枕關河愁落月鵝洋

風雨六更潮

夜聞
吠蛤

舟中同李繡宸秀才作

夕樹檣杪外移舟傍淺沙
風聲響山葉電影落巖花
濟世思長楫浮生此短艖
天涯有知己慎莫苦思家

南岸晚步

林隙疏鍾動歸雲夕照邊
山花空礪雨樵跡晚邨煙
暮色高千鷺寒聲響一蟬
江帆渺向處困水憶歸鞭

至淮安山
岸路歸

到家喜劉炯甫至

鴻雁天外翔乘風懷我友
我友總角交杯茗論詩久
任延賓九齡才聲集文藪
名馳甘露頂華藻追黃九
奕奕齟齬資英

英良非偶叩叩相負行鵲鵲飛則耦繫我政水游陽關贈我
柳游子淚兩行欲泣還掩口落日春遲遲薄雲散杯酒見時
無一言有言在見後願身化明月照君齋中牖今歲戩翼歸
黃鍾等瓦缶璞玉縱棄捐洪音終大叩忽報來故人汪汪蕩
塵垢

春閨恨詞

金壺瀝血恨紅娥紫玉殘釵鬱咽多不向邯鄲輕傅粉背人
雙淚落秋波

臨風叩叩佩香囊羅袂幽蘭暗自香可怪蔣侯第三妹青谿

獨處亦無郎

時劉三炯甫
與余同報罷

玉簫環指認前身
荳蔻薰湯洗濯新
鸞鏡房櫳涼似水
簫聲吹瘦捲簾人

杏花春雨不禁寒
枝上鷓鴣聲破夢
殘斜拔搔頭彈錦瑟
多情

韓重遇應難

余於韓學使
備取而未售

游仙詩寄劉炯甫

淮南雞犬盡仙期
火候叅同只自知
靜聽藐姑天上曲
月明唱我落花詩

紅綃曲

七言古詩學長慶體而出以博麗近代首推吳梅村
然香山失之甜滑梅村失之贍實前明何大復明月

篇又失之空廓王漁洋論詩不取明月篇是也惟以
初唐四傑爲皮以長慶爲肉以杜爲骨則於風人之
旨思過半矣近代擅此體者以山左單芥舟爲最家
石甫與子萊二君均倣爲之因成此篇請質若綺語
誨淫則吾豈敢

太師氣燄吞雲霄珠喉宛轉歌紅綃金閨幾曲紅樓悄玉笛
一聲明月高誰家公子飄飄舉獨向侯門跋珠履緋桃手擘
貯金甌金甌微露纖纖指指上紅綃玉笋參胸前明鏡秋波
涵花飛寂寂更無語雪豔盈盈三月三誤到蓬山春欲暮歸
來閒作天台賦紫閣香寒翡翠衾明璫煙冷鴛鴦渡短鬢蓬

頭劍客雄仰天長嘯浮雲空世間豈有不平事眼看明月飛
青銅珠歌翠舞誰家院玉女星眸侍春宴琥珀杯濃碧玉漿
珊瑚簪脫黃金釧花陰十五月輪低青絹裁成短後衣深院
不愁花作障重垣不畏錦成圍花陰小犬金鈴吠鍊鎚一擊
瑤瓊碎撾殺信信孟海洲凌空奪得延年妹不別金缸繡戶
扁微聞薌澤透紗櫺翠環初墜金釵冷紅臉纔舒玉漏停碧
雲飄斷蘭膏歇獨倚闌干望明月一枕鴛鴦夢未成仙郎已
到芙蓉闕夜深花逕有誰來風動珠簾繡幕開潁語瑯嬛驚
笑靨花冠不整酌金甌自言妾是幽燕女月下喁喁私與語
記得將軍擁翠旄朔方虜盡鉛黃侶僕玉漿金近綺羅瓊筵

日日擁笙歌。妾自偷生貯金屋。郎如佳約渡銀河。况是爪牙
有神術。不使春嬌厭拘束。奮翮凌霄比翼飛。妝匣掃盡鸚哥
綠。遲明日出太師驚盜出。紅綃雞未鳴。雪泥鴻爪春雲碧。道
是無情却有情。古來大使神州有英雄。勸汝一杯酒。天上人
間兒女情。博取紅顏如返手。金戈鐵馬千人呼。紫電青霜塞
道途。瞥若翅翎鷹隼疾。誰家蓄得崑崙奴。

閩朱竹垞詩話有感前明許啓衷死節

矯詔平章痛抱冤

許天錫閩縣人宏治中上疏劾劉瑾爲瑾所殺

千秋遺恨許黃門

車盤驛壁題詩在黃犢出林知有村

莪蒿篇

伊誰誦莠蒿莠蒿音慘切我生命不辰欲語但嗚咽方書苦
無靈九閻不通謁穹穹與厚厚親愛一朝歇須臾別已難不
信有永訣

伊誰誦莠蒿莠蒿不忍讀我心徒悲傷墓門空築屋渺渺望
孤雲哀哀形影獨思昔承歡時真爲人子福至哉朱生言不

如村舍犢

朱錫鬯先生
有村舍犢詩

展墓

墓在北關外一峯
山俗曰一鳳山

松楸親顏色蕭蕭鳴聲哀一卷易歸匣千哭萬徘徊夕陽林
際暝寒影橫蒼苔天鰲鬱悲音百憂從中來素月低下春黯
然照荒萊孤兔竄淺草形影空疑猜四望無人迹零露濕我

顚潛潛出涕洟徙倚肝腸摧死
音長已矣生者難心灰

追慕

九京何處返親魂
霜葉棲鴉冷墓門
迴憶寒燈嚴課讀
秤鎰猶哭舊瘡痕

題女鬼趙婉容詩卷

梨花寒食哭涼宵
露草縣芊骨欲銷
腸斷十三樓上月
芳魂黯黯雨蕭蕭

婉容詩有哭向涼宵愁對月冷螢飛上十三樓之句

秋日晚晴登于山樓同秩庭

秋聲起天末
黛色失煙鬟
梅落風前笛
鐘飛雨後山
故人同菊淡
暮鳥逐雲閒
百尺危樓迴
登臨此改顏

同秩庭飲臨江樓

萬樹蒼茫際飛來兩白鷗江山此杯酒風月又扁舟
蘿帶碧緣岸菜花黃上樓平生足懷抱未倦陸機游

中宵

中宵兀無寐忽然反鴻濛鴻濛孰爲人三百六倮蟲臂彼萬
孺子胞與乾坤同聖人爲之長不能爲之聰闢牆一家內操
戈同袍中斯時欲返初大聲莫覺聾仿佛萌芽外苞蔽千萬
重籜去筍乃見物生始曰蒙老聃稱嬰兒軒皇師小童

夢中得有無釵影燭初成醒續成一絕

有無釵影燭初成破夢窗前落葉聲長憶佳人雲水路捲簾

紉袖隔霜清

書玉環傳後限愁字同秩庭作

舞馬黃衫在御樓宮人白髮淚交流徒令粉黛羞顏色何事
珍珠慰懊愛傾國有花專席寵照簾無月上陽愁一從動地
聞鼙鼓比翼鴛鴦夢不秋

得謝碩甫鷺門書却寄

海天明月照寒衣落葉蕭蕭捲地飛舊雨壺觴何限思故人
鞍馬幾時歸南皮高會懷吳質西洛孤棲惜陸機可記三山
霜雪夜殘燈孤角語柴扉

阨過

讀書禪寺幾
遭廟門之阨

多難臺卿九死存親朋幸免賦招魂猶憐待嫁文簫婦寶鏡

能圓夙世恩

是歲議娶

送孫暢空歸惠安省親

東去水粼粼荊峯古黛皺平沙煙樹暗飛雪鹵池春碧海搜
蛟蜃青山護鬼神

青山在惠安有靈安王廟

頻牽游子夢近倚白雲親

送鄭玉谿歸蕭甯

笛裏關山路幾千滿身風雪入幽燕半村榕葉清江樹九里
梅花細雨天游子還鄉仍負米全家傍水好耕田他時回首
西甌望柳色青青帶曉煙

催粧詩

兩行銀燭畫簾開
鸞鳳今宵下鏡臺
不事天錢賒百萬
漢書一部壓箱來

紫簫吹月倒金壺
佳話雙棲記碧梧
吟到六珈偕老句
鴛鴦

圖是比肩圖

吳蔚林梁君榮繪鴛鴦圖並賦鴛鴦曲三十章相贈

吳蓬山自楚南寄遊湘詩草代柬答之

楚天雁去暮歸雲
長笛高樓萬里聞
衡岳蘆花悲仲舉
洞庭

薺草弔湘君
鯽魚多處難求餌
犬子貧來孰買文
飛到蒼梧

黃葉句令人筆硯竟思焚

寄來黃葉樓詩草一卷

讀史有感唐天寶用兵失度五首

漢陵雲樹動清秋
胡騎陰山尚未收
往憶玉棺寒寢劫
况當

珠柙故宮愁孤城傳箭空營火落日迴旗黯戍樓聞道將軍
天上下茫茫鵲印莫輕求

朝廷宮闕倚天高詎意徒煩廟算勞香積孤軍誰後效涇陽
輕騎問先逃何來京觀長鯨築空望旌旄旅雁號社稷煙塵
憂不細故侯疇是霍驃騠

叶陶

宮殿空聞暮角淒薊門回首暝煙低沙場白骨連禾黍墟市
黃塵受鼓鼙滄海橫流漚水北潼關遠阻太行西總戎誰裕
屯田計目斷軍儲秋草淒

淒涼夔府久蒿萊烽火南中動地哀絕域文鵬沈北向大宛
天馬歇西來闔戎無策閒長駕金紫何人稱將才千載忠臣

襄戴異炎方珠玉有餘財

蜀道封疆詔選師雲臺寄重慎登陣軍聲不解威難震大將
空勞矚有絲徒領鋪音敷敦驤萬騎幾曾談笑卻千熊魚鳧故
國藩籬鎮冠佩眞思褒鄂姿

貧交謠

破衣不典可以禦寒貧交不棄可與彈冠

榮辱謠

小言如桔槔大言如金玉關尹子語用之不得當百駟莫能贖桔
槔有時榮金玉有時辱

寒夜書懷寄秩庭三首

高城蕭瑟漏聲殘聽我鳴梭說鼠肝涼露在天冰在硯青衫
擁簡不禁寒

井臼躬操共食藜清貧何事累山妻裙釵幸遇鸞凰友有爛
明星聽警雞

門巷蕭蕭索米回西風腸斷雁聲哀男兒餓死填溝壑莫乞
王孫一飯來

詠錢和秩庭

銅山終古屬空虛祇是方圓世不如能使鬼神通禍福直教
骨肉變親疏恃才傲物奴難免作態凌人臭未除自笑生平
忘棄汝卻因有汝可藏書

古劍

壯士千年去人間此鐵兵驅

向天亦黯出匣鬼曾驚問答君

親義鳴多節烈聲鋒棱藏莫

路箇裏獨錚錚

金人詠劍詩箇裏鋒棱藏莫露

紫簫招鳳圖爲張玉夫

公子賦

玉夫聘而未娶其外舅招至其家讀書因緣偶

見女題詩扇上懷之因作此圖未幾女捐館

鳳凰臺上虛明月鳳凰臺下落春花一從秦女吹簫後瓊樓

韻事屬仙家仙家樓閣春雲裏蕭史前身張公子瀟灑宗之

美少年文章爭貴洛陽紙東家少女如明珠環珮淒涼夜月

孤紫簫吹徹紅閨豔多情失墜知也無腔喉渺渺出碧梧竟

寫丹青入畫圖飛聲歌管停仙姑十年前已聘羅敷誰謂羅

數自有夫宵宵天上狼對弧遙遙畫裏郎見吾牽牛隔水思
黃姑音入九天落紅霞二十四橋月如練花間聽曲替花愁
曲罷紅英飛片片紅英片片催月殘瑤臺小立不禁寒雙飛
雙集雙入夢夢中紈扇傳詞壇扇頭字字皆洸瀾示我此圖
墨未乾崔徽粉本人爭看美人微步來珊珊怎奈如花隔雲
端望君莫共仙姬騎鳳去使我相思寂寞摧心肝

注經

苦心御戶復持銅靜住羣經動注空山妻有身居側室

爾月居側

室乃妻居偏室也舊解禮記誤胎教且學蔡季通